

Xojon carta xi ma-ne jò xi kiskiì San Juan

Kjoa tsjacha ko kjoa kixi

¹Ji ndí chjoón xi xó jaàjiin-lè Nainá, ko jñà ixti-lè, tikjiì-nò Xojon jè 'an xi xita jchinga 'mì-na ya ingo. Nguì okixi-né nga matsjake-nò; mìtsà ta 'an xi matsjake-nò, tikoáá matsjakeè-nò ngats'iì jñà xita xi jye beè kós'ín tjín xi kjoakixi. ²Koií k'oas'ín matsjake-nò, nga jyeé ndaà tíjiin ya inima-ná jè xi nguì kjoa kixi, ko yaá kíjnajiin kjit'aà skanda nita mé nachrjein-ne. ³Nainá xi Na'èn 'mì-laà ko Na'èn-ná Jesucristo xi Ki'ndí-la Nainá ma, kàtatsjá-nò kjondaà, kàtahimakeè-nò, 'nchán kàtasíkjina jjiin inima-nò, xi nguì ko kjoakixi ko kjotsjacha-la.

⁴'Ñó kjòtsja-na k'e nga kijtseè xkoaàn i'nga ixti-lè, nga k'oáá s'ín nchisjchá yijo-la koni s'ín tjín kjoa kixi ts'e Nainá, koni s'ín jye tsatixoma-ná jè Nainá xi Na'èn 'mì-laà. ⁵K'oáá s'ín tìbitsi'bà-nò i'ndeì jñò ndí 'ndsè xi 'ñó matsjake-nò, nga mochjeén-né nga 'ñó kòtsjachaá xinguiáá nga jngó íjngoá. Ko mìtsà kjotixoma xitse xi tikjiì-nò, tijé-ne jè kjotixoma xi kitjoé-ná skanda tisa tàts'en-la kjoa. ⁶K'oáá s'ín tjín xi it'aà ts'e kjòtsjacha, jé-né nga k'oas'ín sikitasoán koni s'ín tjín kjotixoma-la Nainá; jyeé kina'ya nga tisa 'ñó kjòtseé kós'ín tíchja kjotixoma nga 'ñó mochjeén nga kòtsjachaá xinguiáá nga jngó íjngoá.

Xita xi konachan

⁷Nga kjin ma-ne xita xi tjímasòn nga tíjngodè isò'nde xi nchikonachan-la xita, nga tsò: “Mìtsà 'én kixi nga k'oas'ín kits'iìn Jesucristo nga xita komà koni jñá.” Jè xita xi kòtsò, ta tíkonachan-né ko jè-né xi tjina ítjòn nga kondra fi-la Cristo.

⁸Ndaà t'een kindà yijo-nò, mé-ne nga mìkiì sìchjaà-nò jè kjojtò xi tjoé-nò it'aà ts'e xá xi títsa'nè. Nga mochjeén-né nga kàtatjoé yije-nò jè chjì-là xá xi títsa'nè.

⁹Ngats'iì xitá xi otonè-là koni s'ín tjin 'én xi tsakóya jè Cristo nga xìn ndiyá kjoé, mìtsà Nainá tijnako; tanga jè xi kixi tjna nga k'oas'ín tís'ín koni s'ín tsakóya Cristo, yaá tijnako Nainá xi Na'èn 'mì-laà kò jè xi Ki'ndí-là ma. ¹⁰Tsà k'e jngòè xitá kijchòkon-nò xi mejèn-là nga 'én-là Nainá keènojmi-nò tanga tsà mì k'oas'ín okóya koni tsò 'én-là Cristo, kì kiì biì'nde-laà nga ni'ya-nò fahas'en kò kì 'mì-laà: “Tìkjáyì.” ¹¹Nga jè xi tsjá'nde-là nga sìikas'en ni'ya-là, tìkoáá yaá tísingàsòn-kò kjohìtsjeèn-là jnà xitá xi ta kjoà ndiso nchihokóya.

'Én xi fehet'aà-ne

¹²Tjin jchán-isa mé 'én xi mejèn-na nga koxán-nò, tanga majìn-na nga tà Xojon kit'aà-nò. Jè xi mejèn-na nga kjíkon xátí-nò. K'ée isa ndaà jchibá mé-ne nga ngats'iaá ngàsòn ngáya kàtas'e-là kjotsja inima-ná.

¹³Jnà ixti-là chjoón tichji xi tìkoá xó jaàjìn-ne Nainá nchisíkasén-lè 'én nga síhixat'aà-lè. K'oas'ín kàtama.